

Liklik nius long

*prea,*

*givism na go*

**EBC Wok Misin**  
NIUSLETA NO. 67 SEPTEMBER 2018

## **DIA OL PREN BILONG WOK MISIN!**

Mipela i amamas long salim dispela niusleta No. 67 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 30 Septemba, 2018. Ofa long dispela Sande i go long sapotim wok misin. Tenkyu tru long prea bilong yupela ol bratasusa i harim ol dispela ripot.

### **Adres bilong salim mani:**

EBC Overseas Mission  
BSP Goroka Branch  
No. 1000 751 861

### **OI Fild Adres:**

**Mike Kaire**  
EBC Community Service  
P.O. Box 250, Dili, East Timor  
Mobile: (00) 670 77757402  
Email: mikekaire@gmail.com

### **Sifu Family**

STT BMW Papua  
Nabire 98802  
HP: 0852-1357-0016/  
0812-48620-831  
Phone: (+628) 124 8620831  
Email: sifuutina1@gmail.com

### **Missions Mobiliser**

Muko Aveo  
missions.mobiliser.ebc@gmail.com  
Mobile: 72681881

### **Liklik nius long EBC Wok Misin**

Design & Printing by:  
EBC Publications Department, Lae

Dia ol bratasusa long nem bilong Jisas,

Tenkyu tru long yupela i save stap tru long inapim laik na tingting bilong God long autim nem bilong Jisas long olgeta hap bilong graun.

"Ol bikman i save, Pita wantaim Jon i no bin skul. Tupela i man nating tasol. Tasol ol i lukim tupela i tokaut strong na i no pret, olsem na ol i tingting planti. Na ol i save, bipo tupela i stap wantaim Jisas." Aposel 4.13

Long autim gutnius bilong Jisas Krai, yumi no mas tingting long go long wanpela bikpela skul. Yumi gat save o yumi nogat save, dispela i no wanpela hevi. Tasol yumi pas gut wantaim Jisas, beten planti na stadi gut long Tok bilong God, dispela tasol i save givim pawa na strong long autim gutnius bilong Jisas Krai.

Mipela i amamas tru long bringim sampela moa nius long ol misin fil bilong yumi. Hia sampela nius bilong Is Timor na Indonesia.

## **IS TIMOR**

Planti gritings i kam long nem bilong King Jisas long yupela olgeta. Mipela i tingim yupela ol dia pikinini, ol yangpela, singel na ol yangpela marit na tu, mipela i no lus tingting long yupela ol dia brata na susa.

Krais tasol i bungim yumi olgeta long mekim dispela wok insait long gutpela blut em i bin kapsaitim.

## **TENKYU**

Tenkyu tru long yupela i save tingim wok long Is Timor na prea na givim wantaim bel long sapotim wok long hia. God i ken blesim yupela tru.

## **RIPOT BILONG WOK**

"Skulim pikinini bilong yu long bihainim gutpela pasin, na em bai i wokabout long dispela rot inap long em i lapun tru." Gutpela Sindaun 22.6

"Larim Tok bilong God i pulimapim tingting, bosim bel na stiaim olgeta wokabout."

Mipela i laik inapim dispela tok long olgeta lain:

- Kindergaden long Borai
- Sandeskul long Borai
- Praimeri Skul
- Junia na Sinia Skul
- Strongim ol yangpela
- Sande lotu wantaim ol Kristen na felosip grup.




Kindergaden Borai



Sandeskul Borai

Mipela i save visit long ol sumatin bilong bipo Inglis klas long ples Borai. Mun i pinis, mipela i save bung na felosip long Borai.

God i helpim na ol i lainim Baibel ves.



Topauk Primary School



Ol Junia na Sinia Skul sumatin

“Bikpela, skulim mipela long daunim mipela yet, givim mipela hangre long save long yu, laikim yu na givim biknem long yu wantaim olgeta tingting na pasin bilong mipela.” God i kisim biknem! Ol i gat hangre na bel bilong ol i op tru long harim na lainim. Maski, em i longpela hap, ol i save taitim bun long kam long Sande lotu.



Ol Kristen long Borai Sande Lotu

Visit long ples Dare long bungim ol sumatin bilong bipo. Nau ol i bikpela manmeri na mipela i save strongim ol long Tok bilong God. Ol i tingim yet 1 Jon 1.7, Jon 3.16, Jon 14.6. Tok i stap pinis long bel bilong ol.



Visitim ol sumatin long ples Dare

**Visa** - Tenkyu tru long prea, God i helpim na gavman i givim 2-pela yia visas long mipela.

Tenkyu tru long stap wantaim mipela long wok long Is Timor.

Gritings!

Mike na Mangen

## TENKYU POIN

- ☞ God i blesim wok long Is Timor.
- ☞ Ol manmeri i hangre long Tok bilong God.
- ☞ God i helpim na Mike na Mangen i kisim 2-pela yia visa.
- ☞ Dua i op long wok misin long Wes Sepik.

## ASKIM POIN

- ☞ God i ken helpim nupela gavman long Is Timor.
- ☞ Prea long gutpela tingting na save long Mike na Mangen.
- ☞ Long sios long Borai na Loes, nupela Baibel Skul.
- ☞ Prea long registresen bilong EBC Komuniti Sevis.
- ☞ God i ken opim dua long Sifu famili.
- ☞ Ol Kristen long Indonesia i ken sanap strong.
- ☞ Prea long ol Muslim long Indonesia.
- ☞ God i ken helpim ol wokmanmeri long Inlan Misin.
- ☞ Wanpela marit na singel i ken go long Green River.

## NABIRE

Yumi laik tenkyu long God i bin opim dua long yumi inap go long Indonesia na wok namel long ol Wes Papua lain. Tenkyu tru long prea bilong yupela long famili Sifu long kisim visa. Mipela i wet yet long taim bilong God bai God yet i ken opim wanpela dua long famili Sifu i go bek long wok wantaim ol Wes Papua. Mipela i no klia hamas taim bai yumi wet olsem na famili Sifu i kam bek na stap long Kainantu nau.

Yumi laik wok insait long wanpela kantri we em i save birua long Tok Tru bilong God. Em i wanpela hatpela pait na yumi nid tru long beten planti inap God i mekim mirakel.

Dua i op pinis long Wes Papua tasol, narapela sait tu i gat pait long winim na kisim graun. Olsem na yumi gat bikpela wok long prea planti.

Yumi no mas tubel long famili Sifu i no inap i go bek.

“Yumi save, God i save mekim olgeta samting i wok wantaim bilong mekim gut long ol man i save givim bel bilong ol long God. Em dispela ol man God i tok pinis long kisim bek ol, na em i bin singautim ol.” Rom 8.28

## INLAN MISIN

Papa Kunumb Kanz na yangpela Jon Kumul tupela i wok misin long hap bilong Green River na ples Dio, em tupela lotu ples. Plis prea inap wanpela marit wantaim wanpela singel i ken go na sapotim tupela.

Pilip Amino em i hetmasta long Hibru Praimeri Skul husat i lotu long EBC na askim long prea long em inap God i ken strongim em.

I gat singaut yet long Biak 1 & 2 na Telefomin. Plis prea long God i ken salim wokman long ol dispela ples.